

DEMANTI NASIHE POZDER: "Zbog odbijanja predsjedavajuće da sazove sjednicu..."

Pismo zastupnice Naše stranke u Parlamentu FBiH prenosimo u cjelosti...

Hronika 09. Jan. 2019 09. Jan. 2019



"29.12. 2018. na portalu Slobodna Bosna, objavljen je tekst pod naslovom "Prvi veliki reformski potez Naše stranke: Nasiha Pozder podigla platu Sabini Čudić, retroaktivno!"

Tekst možete vidjeti na linku: http://www.slobodna-bosna.ba/vijest/101518/prvi_veliki_reformski_potez_nase_stranke_nasiha_pozder_podigla_platu_sabini_cudic_retroaktivno.ht

Nisam bila kontaktirana niti u vezi s jednom tvrdnjom iznesenom u tekstu, a svaka od njih nastoji me prikazati u negativnom svjetlu te moje političko djelovanje u Federalnom parlamentu predstaviti kao kriminogeno. Time je prekršen član 5 Kodeksa za štampu i online medije, koji se odnosi na tačnost i fer izvještavanje:

"Novinari neće objavljivati netačne ili krivonavodeće materijale u vidu fotografija, tekstova ili drugih materijala. Fotografije i dokumenti ne smiju biti falsifikovani i/ili korišteni na krivonavodeći način.

Novinari ne smiju prikrivati i/ili zadržavati važne informacije čije bi obznanjivanje moglo materijalno uticati na tumačenje objavljenog izvještaja i razumijevanje kod čitalačke publike. Novinari imaju profesionalnu obavezu blagovremeno ispraviti bilo koju objavlvenu informaciju za koju se utvrdi da je netačna.

Izvinjenje i/ili ispravka će biti objavljeni s dužnim isticanjem.

Novinari će uvijek izvještavati istinito i tačno o ishodu radnje poduzete u vezi s klevetom u koju su bili uključeni. Novinari će izvještavati samo na osnovu činjenica čije je porijeklo novinaru poznato.

Kod izvještavanja i komentara kontroverze, novinari će se potruditi da saslušaju i predstave sve strane u sporu. Ukoliko jedna strana u kontroverzi odbije da se stavi na raspolaganje novinaru, publikacija može opravdano navesti ovo odbijanje u svom izvještaju.+

U skladu s ovim Kodeksom, član 7, podnosim zahtjev za objavu demantija. Demanti nije duži od vašeg teksta i zahtijevam da bude objavljen na jednako istaknutom mjestu kao i članak, na naslovnoj stranici portala.

U nastavku slijedi tekst demantija:

U tekstu Slobodne Bosne 'Prvi veliki reformski potez Naše stranke: Nasiha Pozder podigla platu Sabini Ćudić, retroaktivno!', koji je potpisan inicijalima S.B., iznesena je tvrdnja da je 'zamjenica Privremene administrativne komisije Predstavničkog doma Nasiha Pozder iskoristila svoju poziciju da sazove hitnu sjednicu komisije kako bi svojoj kolegici Sabini Ćudić podigla platu po novom koeficijentu i to retroaktivno. Drugim riječima, podigli se koeficijenti, a oni sebi obračunali platu od novembra'.

Istina je sljedeća:

Na konstituirajućoj sjednici Zastupničkog doma Parlamenta Federacije BiH, održanoj 27. 11. 2018. godine, konstituisani su i klubovi zastupnika stranaka koje čine BH blok te izabran predsjedavajući ovog doma gospodin Elvir Karajbić (SDP). Ovaj proces bojkotovale su stranke SDA i HDZ.

U proteklom periodu svoje klubove formirale su ostale parlamentarne stranke, što su organi Zastupničkog doma Parlamenta Federacije BiH uredno zaprimili i protokolisali. Uprkos činjenici da izbor predsjedavajućeg pred Ustavnim sudom u međuvremenu nisu osporavale ni SDA ni HDZ, ove dvije stranke u potpunosti bojkotuju rad Zastupničkog doma i njegovih radnih tijela, što se pokazalo nedolaskom na Kolegij održan 27.12. 2018. godine.

U skladu s ovim bojkotom izdata su, između ostalog, i rješenja o platama koja negiraju postojanje konstituisanih klubova i većinom izabranog predsjedavajućeg gospodina Karajbića.

Na zahtjev svih stranaka koje ne učestvuju u bojkotu rada Zastupničkog doma, a u skladu s Poslovníkom, zakazana je sjednica privremene Administrativne komisije kako bi se, između ostalog, izvršila korekcija spomenutih rješenja s ciljem priznavanja formiranih klubova te predsjedavajućeg. Svi korigovani koeficijenti, potpisani ovim rješenjima, su identični koeficijentima godinama važećim za ove funkcije.

Zbog odbijanja predsjedavajuće da sazove sjednicu ovog radnog tijela, istom sam predsjedavala ja, kao potpredsjednica Komisije, i potpisala jednoglasno izglasane korekcije ranije izdatih rješenja. Funkcija potpredsjednice privremene Administrativne komisije ni na koji način ne omogućava onome ko je obnaša da bilo kome poveća platu".

Tagovi: **NASIHA POZDER** **DEMANTI** **PLATA**
